

«Ina bun'entschatta ei decisiva per l'entira veta»

Ier han 14 affons da Tujetsch entschiet l'emprema classa a Rueras


■ (sb) Quasi en tuttas vischnaucas dil Grischun ha la scola entschiet ier. Per mellis affons da siat onns ei quei stau gl'emprem di da scola. La Quotidiana ha visitau l'emprema classa da Tujetsch ed observau co ils pignets han fatg in impurtont pass viers lur futur. Ier allas nov ha il scolast *Tarcisi Hendry* beneventau a Rueras 14 scolars dall'emprema classa. Cun eglg gross, fatschas cotschnidas, plein marveglias e tensiun ein ils pignets entrai en stanza da scola. Els ein vegni accumpignai da lur mummas che parevan medemamein d'aver sentiments curios. Per mintgin haveva il scolast nudau in pult cul num e las mummas han astgau gidar d'endrizzar quel. Gia suenter diesch minutas ha ei giu num prender cumiau: «Uss ei il mument vegnius, nua che vus stueis schar dar in techet vies affon», ha Hendry detg allas mummas ed aschuntau che quels seigien ussa las persunas principalas. Pils geniturs e lur damondas ha el era priu temps ier a caschun d'ina sera d'informaziun. Malgrad che Tarcisi Hendry ha gia entschiet siu 34avel onn sco scolast fuva era el nervus. «Co ils scolars semettan en gl'emprem di ei fetg impurtont e decisiv per l'entira veta, els duein sentir gia oz per tgei ch'ei va», ha il scolast declarau.

Bien clima – buna lavur

Suenter haver priu cumiau dallas mummas ein scolast e scolars serimnai entuorn in cartun rodund dalla color melna. Tuts han astgau lignar tgei che quei savess esser e la fantasia dils affons pareva senza cunfins. «Igl ei in sulegl ed era nus lein esser sco in sulegl e far plascher in a l'auter», ha il scolast priu las marveglias ed intimau ils affons da far mintga di ina tschera sco in sulegl ed haver bien in cun l'auter. «Lu eis ei bi d'ir a scola», ha el cuntinuau repartend a mintgin in radi dil sulegl. In suenter l'auter ha

astgau scriver siu num sil sulegl e sco emprema lavur han ils pignets astgau colurar lur radis. Il sulegl che vegn amplificaus culs radis dils scolars dalla secunda classa duei decorar la stanza e far endamen che tuts ein ina cuminonza. En tut ha Tarcisi Hendry 25 scolars dall'emprema e secunda classa. Quels ein denton buca savens en scola ensemen aschia ch'el ha temps avunda da s'occupar cun mintgin. A Hendry che ha gia dau scola 33 onns scola plai sia lavur aunc adina fetg bein: «Igl ei fascinont co ils affons vegnan gl'emprem di, ins sa far aschi bia cun els e vesa bein il success.» Pil scolast eis ei impurtont ch'il clima en scola e la relaziun in cun l'auter constettien, lu constetti era la lavur. Plaunet vesev'ins ch'equalin haveva las larmas orasum e detgavunda da tut il niev. Aschia ei la messa da scola stada ina buna distracziun. Il

reclama



suentermiezdi ha ei giu num finir il sulegl e far strehs. Cun sia experientscha ha il scolast observau quella lavur e sa aschia gia dabia dallas fermezas e fleivlezas dil



Ier ha Tarcisi Hendry intermediau a ses 14 scolars dall'emprema classa da Tujetsch il sentiment e spert d'esser ina cuminonza.

FOTO S. BEARTH

singul. Damai che Hendry enconuscha aunc buca sia classa eis ei era per el tut niev e l'entschatta decisiva: «Sch'igl emprem di gartegia hai jeu il sentiment che tut gartegi.»

Regl da saver

Oz emprendan ils 14 scolarets da Tujetsch gia in bustab. «All'entschatta dalla scola han ils pignets in regl da saver, els vulan imprendere e buca far ter-

magls», ha Hendry declarau. *Valerio Deplazes* ei vegnius bugen a scola e ha schizun semiau dalla scola: «Ir a scola ei lüssig, jeu lessel imprendere tut, era quels bustabs pigns e da scriver ligiau.» Sia conscolara *Romina Maria Decurtins* fuva in techet nervusa pervia digl emprem di da scola. Era ella vul imprendere da scriver, leger, quintar e maliar. «Per mei eis ei negin problem da star eri en scola, quei stuevan nus era mintgatun star

en scoletta», ha la buobetta manegiau. «Quei ch'ils affons emprendan en quei onn da scola ei in capital per lur entira veta», ei Tarcisi Hendry perschudius. Ins vesi mai pli aschi bein il success sco en l'emprema classa, declara il scolast ch'instruescha cun fascinaziun. El anfla satisfacziun en sia lavur e survegn mintga di anavos bia dils affons. «In'egliada, in surrir, in engraziell, tut quei enrihescha e carga mias battarias.»